

Illuliortiternernut aningaasalersuineq pillugu inatsisip allanngortinnissaa pillugu Inatsisartut Inatsisaat (Tulleriiaarinissamut uppersarsaaneq, sanaartortitsinernut naatsorsuutit, kaaviiaartitsinissamut inerteqqut, piffissaq sioqqullugu taarsigassarsianik akiliineq il.il.)

§ 1

Illuliortiternernut aningaasalersuineq pillugu Namminersorlutik Oqartussat inatsisaat nr. 14, 24. marts 2023-meersoq Illuliortiternernut aningaasalersuineq pillugu Inatsisaatigut nr. 28, 13. juni 2023-meersutigut allanngortinneqartoq naapertorlugu Illuliortiternernut aningaasalersuisarneq pillugu inatsimmi nr. 39, 23. november 2017-imeersumi makku allanngortinneqarput:

1. § 1, imm. 2 imatut oqaasertalerneqarpoq:

” Imm. 2. Inissianut piginnittumiit imaluunniit attartortumiit taassumalu inoqutigiivinit najugassap aammalu aalajangersimasumik najugaqarfissap saniatigut siunertanut allanut tamakkiisumik ilaannakortumilluunniit atorineqartussanut eqqarsaataasunulluunniit taarsigassarsitisisoqarsinnaananilu tapiissuteqartoqarsinnaanngilaq. Taamaattoq inuussutissarsiutit annikinnerusut namminersorfusut piginnittumit imaluunniit attartortumit taassumalu inoqutigiivinit ingerlanneqartut mininneqarput.”

2. § 11-p kingorna manna ilanngunneqassaaq:

” § 11 a. Inissiaq qularnaveeqqusiullugu taarsigassarsiat allanngortinneqarneranni aammalu piginnittut nikisinneqaratik tamanna pisimappat kommunalbestyrelsi taarsigassarsiaareersunut inissiap niuerfinni nalingata pisortani taarsigassarsiarineqartut inissiami qularnaveeqqusiinikkut qularnaarneqartut 90 %-iannik annerpaamik ilanngaaffiginerinut ataqqinninnermut tulleriiaarinermullu uppersarsaasinnaavoq. Taamaattoq inissianut ukiut 20-t sinnerlugit pisoqaassusilinnut tunngatillugu taarsigassarsiaareersut inissiap niuerfinni nalingata 80 %-iannut annertussusilerneqarsinnaapput, matumani inissiami qularnaveeqqusiinikkut pisortani taarsigassarsiarineqartut inerneranni ilanngaateqarnikkut.

Imm. 2. Kommunalbestyrelsip ataqqinninnissamut tulleriiaarinermullu uppersarsaanissaani inissiami akiligassanngortunut allanut kingusinnerusukkullu akiligassanngortunut assinganik nukingisaarinissamut uppersarsaasoqarnissaanik piunasaqarfiupput.

Imm. 3. Inissiap pisoqaassusaa illuummut atuinnissamut akuersissutaagallartumut ulluliunneqartoq atorlugu naatsorsorneqassaaq.

Imm. 4. Inissiap massakkut niuerfinni nalinga illuutunut nalilersuinerit marluk agguaqatigiissitsinermut tunngasut illuutunut sullissisartunit ilisimasalinnit suliarineqartut atorlugit naatsorsuiffiqineqassaaq, taakkualu illuutit aalaakkaasut najugaqarfissatut pisiarisarnerannut tuniniartarnerannullu suliaqassapput. Illuutunut nalilersuinerit piumasaqaatit pisarneq malillugu atorneqartut malillugit aamma nangaassuteqarnani, piumasaqaateqarnani imaluunniit inniminniinani aammalu piffissap qaammatit 3-6 iluani tunineqarsinnaanissaat naatsorsuutigalugu aningaasat atorlugit tunisinertut suliarineqassapput. Illuutunut nalilersuinerit ataqinninnissamut tulleriiarinissamut uppersarsaanissamut qinnuteqaatit sioqqullugit kingusinnerpaamik ullut qaammatisiuteqarfiusut 30-t qaangiutsinnagit suliarineqareersimassapput.”

3. § 12, imm. 1 nr. 5 ima oqaasertalerneqassaaq:

”5) Inissiaq taarsigassarsisumut imaluunniit attartortumut taassumalu inoqutigiivnut najugaqarfissatut aammalu aalajangersimasumik najugassatut atornagu siunertanut allanut tamakkiisumik ilaannakortumilluunniit atorneqassaaq. Taamaattoq inuussutissarsiutit mikinerusut namminersortut taarsigassarsisumit imaluunniit attartortumit taassumalu inoqutigiivinit ingerlanneqartut mininneqarput.”

4. § 18, imm. 1, nr. 4 ima oqaasertalerneqassaaq:

”4) Inissiaq taarsigassarsisumit imaluunniit attartortumit taassumalu inoqutigiivinit najugaqarfignagu aalajangersimasumillu najugaqarfignagu siunertanut allanut tamakkiisumik ilaannakortumilluunniit atorneqarsimappat. Inuussutissarsiutit mikinerusut namminersortut taarsigassarsisumit imaluunniit attartortumit taassumalu inoqutigiivinit ingerlanneqartut taamaattoq mininneqarput.”

5. § 24, imm. 1, nr. 4 ima oqaasertalerneqassaaq:

”4) Inissiaq taarsigassarsisup imaluunniit attartortup taassumalu inoqutigiivnut najugassatut aalajangersimasumillu najugaqarfissatut atornagu siunertanut allanut tamakkiisumik ilaannakortumilluunniit atorneqassaaq. Inuussutissarsiutit mikinerusut namminersortut inissiamik piginnittumit imaluunniit attartortumit taassumalu inoqutigiivinit ingerlanneqartut taamaattoq mininneqarput.”

6. § 27, imm. 1, nr. 6 ima oqaasertalerneqassaaq:

”6) Qinnuteqartup inuup normua, CVR-normua, najugaqarnermut uppersarsaataa imaluunniit uppersarsaat alla kinaassutsimik erseqqissumik takutitsisoq.”

7. § 33 imm. 1-p kingorna immikkoortutut nutaatut ilanngunneqassaaq:

” *Imm. 2.* Sanaartukkanut naatsorsuutini aningaasartuutit tamarmiusut sananermut, iluarsaanermut, pitsanngorsaanermut alliliinermulluunniit atassutillit ilaatinneqassapput. Sanaartukkanut naatsorsuutit kukkunersuiisartumit nalunaarsorneqartumit, kukkunersuiisumit naalagaaffimmit akuerisaasumit imaluunniit Kalaallit Nunaanni aningaaserivimmit uppersarsarneqarsimassapput.”

Imm. 2 tamatuma kingorna *imm. 3*-nngussaaq.

8. § 33-p kingorna ilanngunneqassaaq:

” **§ 33 a.** Kommunalbestyrelsi § 33 apeqqutaatinnagu taarsigassarsiat kapitali 3-4-mi ilaasut tamakkiisumik ilaannakortumilluunniit ingerlaavartumik tunniuttarnissaanut aalajangiisinnaavoq aamma sulisimanermut

atortussanullu tunniunneqartartut sanaartortitsisartumit akiligassiissutit naleqqussarnissaannut tunngatillugu. § 34 allanngornani atuutiinnassaaq.

Imm. 2. Akiligassiissutip akilerneqarnissaa pillugu piumasaqarneq taarsigassarsisumit aamma sanaartugassanik suliasinneqartartumit uppersaammik atsiukkamik ilallugu kommunalbestyrelsimut nassiunneqassaaq, tassanilu sulinerit atortussallu akiligassiissutitalit suliarineqarsimanerannut sanaartorfimmullu tunniunneqarsimanerannut sanaartortitsisartumit uppersaaneq ilanngunneqassaaq.

Imm. 3. Taarsigassarsisoqarnissaanut neriorsuutip suliarinera ilanngullugu suliarineqareerpat taarsigassarsisoq piaartumik aamma piffissaliussaq kommunalbestyrelsimit aalajangersagaq nallertinnagu uppersaatissanik § 33-mut ilaasunik pisariaqartinneqartunik nassiussissaaq.

Imm. 4. Imm. 3 naapertorlugu piffissaliussaq qaangerneqarsimappat taarsigassarsiat ingerlaannartumik akiligassanngortinneqassapput.

Imm. 5. Kommunalbestyrelsip immikkut pisoqarsimatillugu imm. 3 malillugu piffissaliussaq aalajangersarneqartoq sivitsuiffigisinnaavaa.”

9. § 35, imm. 5 ima oqaasertalerneqassaaq:

” *Imm. 5.* Imm. 2-4 malillugit inissiap annertussusaata naatsorsuiffiginerani inissiami majuartarfinnut ilanngaateqartitsisoqassanngilaq. Torsuusat, majuartarfiit majuartarfiillu sangoriaat ataatsimoorussat, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.”

10. § 35-mi imm. 6-itut ilanngunneqassaaq:

” *Imm. 6.* Naalakkersuisut sanaartornermi iluserineqartut tulluarterpassuk imaluunniit pisariaqartippassuk inissiap annertussusaanut imm. 2-5-imut saneqqutsisut naatsorsuiffiginissaannut akuersissuteqarsinnaapput.”

11. § 37 imatut oqaasertalerneqassaaq:

” **§ 37.** Taarsigassarsianut inissiat nutaat sanaartornissaannut tunniunneqartunut taarsigassarsisup piffissaq sioqullugu akiliinerani akiitsunut sinneruttut qinnuteqarfiusumut kingullermik atuisunut akit naleqqersuutaanni qaammatini 12-ini allanngortumi 1 procentpointimik ilallugu kingullermik Naatsorsueqqissaartarfimmi naatsorsuiffiginera atorlugu qinnuteqarnerup aallartiffianut naapertuuttumik kingumut akiligassanngortinneqassapput. Akiitsut sinneri taarsigassarsisup allakkatigut inaarilluni akiliinissaq pillugu noqqaaneraniit aamma taarsigassarsiani piffissamut ernialersuiffiunani akilersuiffiusussaanngitsumut sinneruttumut kingumut naatsorsorneqassapput, taamaattorli taarsigassarsiat tunniunneqarneranniit siusinnerpaamik ukiunut tallimanut.”

12. § 37-ip kingorna kapitali 6-imi ilanngunneqassaaq:

” **§ 37 a.** Namminersorlutik Oqartussanut nunatsinnilu kommuuninut qularnaveeqqusiussaqarluni taarsigassarsitisinnermut uppersaata aamma akiitsunut uppersaata illuliortiterneq pillugu Inatsisartut inatsisaat manna imaluunniit siusinnerusukkut inatsisaasut naapertorlugit tunniunneqartut kaaviiaartitsinnermut, qularnaveequtitut imaluunniit akiliisitsisussamit malersorneqarnissamut atorneqarsinnaanngillat.”

Inatsisartut inatsisaat ulloq 1. januar 2025 atuutilissaaq.

Imm. 2. Inatsisartut inatsisaanni Illuliortiternermut aningaasalersuisarneq pillugu Inatsisartut inatsisaat imaluunniit illuliortiternermut aningaasalersuisarnerit pillugit siusinnerusukkut inatsisaasimasut naapertorlugit taarsigassarsiat pioreersut Naalakkersuisunit kommunalbestyrelsimiillu tunniunneqartut ilaapput, taamaattoq imm. 4 takuuk.

Imm. 3. Inatsisartut inatsisaanni Illuliortiternernut aningaasaliisarneq pillugu Inatsisartut inatsisaat imaluunniit illuliortiternernut aningaasalersuisarneq pillugu siusinnerusukkut inatsisaasimasut naapertorlugit ulloq 1. januar 2025 sioqqullugu taarsigassarsinissamut neriorsuinerit Naalakkersuisunit kommunalbestyrelsimiillu nalunaarutigineqartut pioreersut ilaapput.

Imm. 4. Taarsigassarsiat allannguutissatut siunnersuutip atuutilernissaa sioqqullugu siusissukkut akilersinniarnissaat pillugu qinnuteqaat § 37 atuussimasooq tunngavigalugu suliarineqassaaq aalajangiiffigineqarlunilu, taamaattoq ukiut tallimat aatsaat qaangiutereernerisigut.

Namminersorlutik Oqartussat, ulloq 25. novembari 2024

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut